

UVODNA RIJEČ

EDITORIAL

Poštovane kolege i kolegice,

pred vama je naučno-stručni časopis Geodetski glasnik, sadržajno prepoznatljiv list koji je već nekoliko decenija glasilo Saveza udruženja građana geodetske struke u Bosni i Hercegovini. U prilici ste da čitate Geodetski glasnik broj 53 izdat u 2022. godini.

Tekuća 2022. godina, u Bosni i Hercegovini će ostati upamćena kao godina u kojoj je donesen Pravilnik o održavanju premjera, katastra zemljišta i katastra nekretnina. Pravilnikom su data uputstva za održavanje geodetske osnove i aktuelnih bosanskohercegovačkih katastarskih evidencija o nekretninama. Ovim pravilnikom se mijenja procedura održavanja katastarskog operata. Pravilnikom je data mogućnost da terenske radove pri provođenju promjena u katastarskom operatu zbog kojih je potreban uviđaj na licu mjesta mogu izvršavati i pravna lica kao i samostalni geodetski privrednici. Ovim je podnosiocima zahtjeva data mogućnost da njihov podneseni zahtjev mogu realizovati zaposlenici Općinske ili gradske službe nadležne za održavanje katastarskog operata ili pravna lica ili samostalni geodetski privrednici.

Ove godine je Bosna i Hercegovina dobila prvi geodetski muzej, koji se nalazi u prostorijama Odsjeka za geodeziju i geoinformatiku Građevinskog fakulteta Univerziteta u Sarajevu. Riječ je o stalnoj izložbenoj postavci starih geodetskih instrumenata i opreme, kartografskih i drugih dokumenata, kojom se daje značajan doprinos u oblasti promocije i zaštite geodetskog naslijeđa naše zemlje.

Nažalost, tekuću godinu je obilježio i jedan tužni događaj. Udruženje je zauvijek napustio Mustafa Begić, dugogodišnji predsjednik i član Udruženja. Poslove predsjednika Saveza geodetskih inženjera i geometara je obavljao od 1980. do 1988. godine kao i, nakon promjene naziva Udruženja, poslove predsjednika Saveza udruženja građana geodetske struke u Bosni i Hercegovini od 1995. do 2003. godine. Mustafa Begić, vrsni geodet i pravnik je bio dugogodišnji direktor Uprave za geodetske i imovinsko-pravne poslove Bosne i Hercegovine. Do posljednjeg časa života je bio posvećen geodetskoj struci i Udruženju tako da je izdavanju svakog broja časopisa Geodetski glasnik davao doprinos.

Bez obzira na okolnosti, temeljni ciljevi Udruženja se realizuju tako da je ovogodišnji broj časopisa Geodetski glasnik, broj 53 izdat i na raspolaganju je Bosni i Hercegovini i regionu.

U kreiranju ovog broja časopisa su učestvovali mnogi autori kao i recenzenti iz raznih dijelova svijeta. Uredništvo časopisa na čelu sa glavnim i odgovornim urednikom je uložilo veliki trud kako bi časopis bio objavljen. Autori radova nisu žalili svoje vrijeme i znanje kako bi pripremili što bolje i zanimljivije naučne radove. Posebno treba istaći i naglasiti trud i rad recenzenata koji su svojim brižljivim i predanim radom doprinijeli unaprjeđenju kvaliteta časopisa.

Posebno želim naglasiti da je Federalno ministarstvo obrazovanja i nauke dalo svoj doprinos u izlaženju ovog broja Geodetskog glasnika. Nadalje, ističem da su i geodetske firme Geobiro d.o.o. Konjic, GeoGIS studio d.o.o. Sarajevo, GeoWild, d.o.o. Sarajevo, Geodet, d.o.o. Sarajevo, Zedis, d.o.o. Zenica, AMG d.o.o. Visoko pomogle u izdavanju ovog broja časopisa.

Veliki je trud uložen u izdavanje Geodetskog glasnika broj 53 te se svima koji su pomogli i koji su direktno učestvovali u izdavanju upućuju riječi najiskrenije zahvalnosti.

Poštovani čitaoci, nadam se da ćete provesti ugodne trenutke čitajući Geodetski glasnik broj 53 i da ćete kao autori članaka ili zanimljivih priloga učestvovati u izdavanju narednog broja časopisa.

Jusuf Topoljak

Predsjednik Saveza udruženja građana
geodetske struke u Bosni i Hercegovini